



Bosnia and Herzegovina  
Federation of Bosnia and Herzegovina

CANTON SARAJEVO  
Ministry of Physical Planning Construction and  
Environmental Protection

Broj: 05-05-18645-2/19 RA  
Sarajevo, 02.07.2019. godine

## SKUPŠTINA KANTONA SARAJEVO

- o v d j e -

n/r Elmedin Konaković, predsjedavajući

**PREDMET:** Dostava odgovora na zastupničko pitanje – zastupnik Igor Stojanović

Zastupnik u Skupštini Kantona Sarajevo, Igor Stojanović, na Osmoj radnoj sjednici Skupštine Kantona Sarajevo, održanoj dana 14.05.2019. godine, u okviru tačke Dnevnog reda "poslanička/zastupnička pitanja, inicijative i odgovori", postavio je pitanja, kako slijedi:

*"Molim Vladu KS, Ministarstvo privrede KS, KJKP Vodovod i kanalizacija, Zavod za javno zdravstvo KS i Ministarstvo prostornog uređenja, građenja i zaštite okoliša da mi dostave Program praćenja kvaliteta vode za ljudsku potrošnju za izvorišta sa kojih se vodom snabdijevaju građani Sarajeva, čija je izrada definisana Aneksom 2 PRAVILNIKA O IZMJENAMA PRAVILNIKA O ZDRAVSTVENOJ ISPRAVNOSTI VODE ZA PIĆE (62/17 Službene novine BiH, 62/17).*

*Molim odgovor da li broj kontrola kvaliteta vode odgovara uslovima navedenim u gore pomenutom Pravilniku, kao i razloge eventualne neusklađenosti.*

*Molim odgovor da li je urađena procjena rizika po kvalitet vode koju pijemo, a koji uzrokuje stambena izgradnja, postojeća i planirana, na širem području planina Igmana i Bjelašnice, pogotovo kada se uzmu u obzir informacije navedene u posljednjem KEAP-u (tabela 46 - izmjerena su višestruka prekoračenja vrijednosti kadmijuma i olova) i skoro kontinuirano zagađenje voda u Vrelu Bosne fekalnim bakterijama.*

*Također molim ministra privrede da nas USMENO obavijesti kakvo je stanje zatekao po ovom pitanju, kakve radnje su po pitanju ovog zagađenja poduzete do sada, te koje aktivnosti se planiraju za budućnost."*

### ODGOVOR:

Priprema Programa praćenja kvaliteta vode za ljudsku potrošnju za izvorišta sa kojih se vodom snabdijevaju građani Sarajeva, shodno odredbama Aneksa II Pravilnika o izmjenama pravilnika o zdravstvenoj ispravnosti vode za piće ("Službeni glasnik BiH", broj 62/17), nije u nadležnosti Ministarstva prostornog uređenja, građenja i zaštite okoliša Kantona Sarajevo, pa prema tome ne raspoložemo sa informacijama da li broj kontrola kvaliteta vode odgovara uslovima navedenim u pomenutom Pravilniku, niti o razlozima eventualne neusklađenosti. Slična je situacija i u smislu



nenadležnosti ovog organa kod obaveze izrade procjene rizika po kvalitet vode za piće u "Sarajevskom polju".

Što se tiče navoda iz KEAP-a u, oni su preneseni iz Elaborata zaštite izvorišta vode za piće u "Sarajevskom polju" koji je rađen u funkciji izrade i donošenja nove Odluke o zaštiti izvorišta vode za piće u "Sarajevskom polju". Inače, Akcionim planom KEAP-a, u skladu sa važećom regulativom u oblasti voda, Ministarstvo privrede Kantona Sarajevo je zaduženo za pripremu nove Odluke.

Na bazi ovih navoda, Kantonalna javna ustanova za zaštićena prirodna područja koja prema Zakonu o proglašenju Spomenika prirode "Vrelo Bosne" ("Službene novine Kantona Sarajevo", broj 6/10 - Prečišćeni tekst) upravlja ovim područjem, u okviru svoje redovne funkcije na očuvanju prirodnih vrijednosti je u saradnji sa Federalnim zavodom za agropedologiju pokrenula aktivnosti na provođenju monitoringa zemljišta. U tom smislu, a prema posljednjem izvještaju pomenutog Zavoda iz 2017. godine, izvršena su istraživanja na sadržaj teških metala i organskih polutanata na ukupno tri lokacije. Pri tome je konstatovano, da je na lokalitetu glavnog izvorišta rijeke Bosne sadržaj olova, kadmija, cinka i arsena iznad dozvoljene granične vrijednosti, da je u centralnom dijelu Prve zaštićene zone - nukleusa sadržaj olova iznad dozvoljene granične vrijednosti dok je sadržaj svih ostalih teških metala ispod granične vrijednosti, te da je sadržaj teških metala na lokalitetu nedaleko od uređaja za prečišćavanje otpadnih voda u sklopu fijakerskog stajališta na Vrelu Bosne (Druga zaštićena zona) ispod dozvoljenih granica. Dat je prijedlog mjera sanacije koje je Javna ustanova dijelom već realizovala u protekloj godini, a prvi uzorak zemljišta nakon primjene sanacionih mjera planiran je u narednom periodu, s ciljem utvrđivanja da li je sadržaj teških metala manji u odnosu na prethodno stanje.

Uporedo, a putem ovlaštenih pravnih lica, Javna ustanova obezbjeđuje i monitoring otpadnih voda na lokalitetima fijakerskih stajališta na Velikoj aleji i Vrelu Bosne, a sve u funkciji sprječavanja zagađenja podzemnih voda, budući da je obuhvat Vrela Bosne istovremeno i obuhvat jedne od ukupno tri izvorišne zone izvorišta za piće "Sarajevsko polje".

S druge strane, JU Zavod za javno zdravstvo Kantona Sarajevo uzima uzorke vode sa izvorišta Vrela Bosne i vrši provjeru fizičko - hemijske i bakteriološke analize vode.

Na kraju, prema zakonskoj obavezi i prevashodno radi zaštite samog izvorišta Vrela Bosne, ovo Ministarstvo je obezbijedilo reviziju zaštićenih prirodnih područja, uključujući i Spomenika prirode "Vrelo Bosne". U funkciji zaštite izvorišta predloženo je, između ostalog, značajno proširenje sadašnjih granica Spomenika prirode "Vrelo Bosne", kako bi se stvorili uslovi za kontinuitet vodosnabdijevanja izvora i vrela na kontaktu Igmana i Sarajevskog polja, pri čemu bi bila obuhvaćena zaštita specifičnih hidroloških i geo-hidroloških struktura. Važno je naglasiti da izvorište vode vrelo Bosne, čije slivno područje čine planine Igman i Bjelašnica i na kojima bi trebalo uspostaviti režim zaštite ovog izvorišta predstavlja upravo prirodnu, hidrološku, hidrogeološku i sanitarno - higijensku cjelinu, a ova činjenica ukazuje na posebnu osjetljivost područja Igmana u smislu odgovarajućeg potrebnog kvaliteta i režima voda u Sarajevskom polju, koje predstavlja najvažniji resurs za snabdijevanje grada Sarajeva pitkom vodom.

S poštovanjem,



Dostaviti:

- Naslov
- Stručna služba Vlade Kantona Sarajevo, ovdje
- Evidencija
- a/a



web: <http://mpz.ks.gov.ba>  
e-mail: [mpz@mpz.ks.gov.ba](mailto:mpz@mpz.ks.gov.ba)  
Tel: + 387 (0) 33 562-029,  
Fax: + 387 (0) 33 562-031  
Sarajevo, Reisa Džemaludina Čauševića 1

